
COMUNICÂT STAMPE

ARLEF E CLAME ADUN I PARLAMENTÂRS CUINTRI TENTATÎF DI DECLASSAMENT DE LENGHE FURLANE

Udin, ai 12 di Setembar – La ARLeF - Agjenzie regionâl pe lenghe furlane e à vût mandât di butâ jù un document che al vignarà sotscriet di istituzions, associazions e comitâts che a àn a cûr il destin dal furlan e che al sarà presentât intune assemblee publice ae presince di ducj i parlamentârs dal Friûl.

La decision si è vude vuê sotsere te riunion indulà a àn partecipât ducj chei che a àn rispuindût al apel de ARLeF, Agjenzie regionâl pe lenghe furlane, par cirî un percors comun cuintri lis ultimis iniziativis dal Guvier che di fat a riscjin di sbassâ il nivel di tutele di minorancis ricognossudis in Italie cun leç 482/99.

Si son incuintradis te sede de Agjenzie, la Universitât, la Provincie e la Arcidiocesi di Udin, i Comitâts 482 e pe Autonomie e il rilanç dal Friûl, la Societât Filologjiche e ducj i ents ricognossûts di primarie impuartance pe tutele e difusion dal furlan.

Insiemit cul president de ARLeF, Lorenzo Zanon, ducj a son daûr a studiâ la soluzion plui juste e efficace par rivâ daurman ae aplicazion dai dirits bielzà stabilîts.

Trê i trois di tamesâ: il ricors ae Cort Costituzionâl, un apel al Consei de Europe che al vigjile su la aplicazion de Convenzion cuadri pes lenghis minoritariis, e la modifiche dal test de ratifiche de Cjarte europeane pes lenghis regionâls ancjemò in discussion in forme plui zovevul pal alçâ il nivel di tutele.

Da ultim al è stât dibatût di prontâ une azion publice, simboliche e popolâr, par slargjâ il coinvolziment a cheste altre bataie par vie che l'obietîf al è comun a dutis lis altris minorancis.

"Si sin inacuarts purtrop che la aprovazion de 482 no je stade altri che la vitorie di une bataie e che la vuere vere si scombat ogni dî sul teren de aplicazion", al à comentât Zanon.

dott. Elisabetta Pozzetto

Regjon Autonome Friûl Vignesie Julie
[ARLeF - Agenzie Regjonâl pe Lenghe Furlane](#)
Place XX Setembar 23
33100 Udin

0039 0432 555724 fax 0432 204158
mob 0039 335 8002058